



मोहक
मधुबाला
पृष्ठ ७

पंचमकारया रहस्य व
नेवा: समाजय् थुकिया प्रयोग
पृष्ठ २

सिटी कि
आर्सनल ?
पृष्ठ ८



Sukrawa:ya Tansapau • Nepalbhasa Weekly

सुकवास्या

नेपालभाषा टाइम्सया सहप्रकाशन

वसन्त

दैं ७ ल्या: ३९, ने.सं. ११४३ सिल्लागा १२ (द्वादशी), वि.सं. २०७९ फागुन ५ गते शुक्रवा:, (2023 February 17), मू ८/- (८ पेज)



मनदेवी व लक्ष्मणकृष्णया मतिनाया बारवं



केशरमान ताम्राकार

प्रत्येक मनूतय् थःथःगु बिस्कं पहःयागु मतिनाया बारवं दइ। अथेहे साहित्यकार मय्जु मनदेवी ताम्राकार तण्डुकार व भाजु लक्ष्मणकृष्ण ताम्राकारया नं थःगु हे पहयागु मतिनाया बारवं दु। वय्कःपिनि ल्याय्मह ल्यासे इलय् अप्वः धयार्थे इहिपा लमि तयाः जुइगु खः। लमि धायेकाः, मह क्यनाः ज्यू मज्यू क्वःछीगु चलन अबलय्। तर वय्कःपिसं लमि म्वायेक हे थवथवय् खं लहानाः खं ब्याकाः इहिपा क्वःछित। अथे धयागु वय् कःपिनि इहिपा मतिना जुयाः जुल। न्हापां मतिना जुयाः लिपा इहिपा जुल। मतिना याये सःपिं मनदेवी व लक्ष्मणकृष्ण मतिनायात थुकथं विश्लेषण यानादी-

मनदेवी- मतिना धयागु निम्ह मह जूसां छगू आत्मा खः ला धयार्थे च्वं। तुसि व तुसिपु न्हयाबले नापं थें मतिनामिपितगु क्वातुगु आत्मियता खः। छम्हेसित घाःपाः जूसा मेम्ह मतिनामिया म्हुतुं 'आया' सः पिज्वइ। छम्हेसिया नुगः थुं दीसा मेम्हेसिया मिखाय् ख्ववि जाइ।

लक्ष्मण कृष्ण - 'मतिना जीवन खः, म्वायेत मदयेक मगाःगु वासः खः।'

लक्ष्मणकृष्ण भाजुं थःत मदयेक मगाःगु वासः कथं मनदेवी मय्जुयात ल्यायादिल। मतिना दुयंक यानादिल। इहिपा यानादिल। ख ला वय्कःपिनि मतिनाया चुलि ह्वःगु थाय् धयागु येया लुँहिनि लिक्कसं च्वंगु सञ्चयकोषया ज्याकुथिइ खः। अथे हे नेपाल संवत् १०९६ साल पाखे वय्कःपिं निम्ह सञ्चयकोषया अड्डाया प्रशासन विभागय् ज्या यानादी। लक्ष्मणकृष्ण मनदेवी स्वयां सिनियर व अनुभवीम्ह खः। ब्वने सिधयेवं तप्यंक अन ज्या न्ह्याकूगुलिं उगु अड्डाय् मनदेवी न्हूम्ह स्टाफ जूगुलिं लक्ष्मणकृष्ण भाजुं ज्या स्यनाबीगु जुयाच्वन। निहिछि ख्वाःख्वाः चूलाकाः ज्या स्यनेगु व सयेकेगु इवलय् वय् कःपिनि नुगलय् मतिनाया चुलि जायावन। मनदेवीया मिखां, नुगलं लक्ष्मणकृष्ण तसकं मिलनसार, ग्वाहालिमि व मेहनति खंकल। अथेहे लक्ष्मणकृष्ण मदेली लिसे छगू अड्डाय् ज्या यायां खँल्हाबल्हा यायां ययावल। वय्कःयात यःगु धयागु मनदेवीयाके दुगु Simplicity खः।

ल्यं स्वंगूगु पृष्ठय्

वय्कःपिं मतिनामि, अनं कलाःभाःत, मांअबु, आः वयाः बाज्या अजि। थुकथं स्वयेबलय् शून्यं जीवन न्ह्याकादीपि साहित्यकार भाजुमय्जु आः ज्याथजिथिया इलय् नं साहित्य सिर्जनाय् जक मखु, आर्थिक, पारिवारिक कथं नं तसकं स्वस्थ दु। थ्व नं छगू ज्वःमदुगु मतिनाया दसु खः।

मनदेवी व लक्ष्मणकृष्णया मतिनाया बाखं

न्यापांगु पृष्ठया ल्यं

मतिनाय वं वयात ययेकी, वं वयात ययेकी। ययेकु ययेकुं जक जुयाः मतिनाया प्रस्ताव तये मछालकि व मतिना फसं ब्वयेका यंकी। अथे जूगु अनुभव यक्व ल्यासे ल्याय्मह मतिनामिपिस. वाःचायेकूगु दु। मतिनां भूचाःपिं मतिनामिपिसं थःगु नुगःया खँ प्रकट यायेमाः। मछाला च्वने मज्यू। अप्वः धयाथें मतिना प्रकट यायेगुलिं मय्जुपिं भचा लिपा लाः। मनदेवी व लक्ष्मणकृष्णया मतिनाय नं मनदेवी मखु, लक्ष्मणकृष्ण भाजुं हे प्रस्ताव तयेमाल। म्हुतुं न्ववानामखु, यःपौ धायेला वा बाखं थें च्वयाः धाये। साहित्यिक रुपय् भवैतय् च्वयाः मतिनाया प्रस्ताव कथं मनेवीयात ब्वनेत बिनादिल। उगु साहित्यिक बाखेपौ मनदेवीं ब्वं ला ब्वन, प्यन्हु न्यान्हु तक नुगलय् खँ वायेकु वायेकुं लिसः बी मफयाच्वन। मनदेवीया लिसः मनेवेवं लक्ष्मणकृष्ण भाजुया नुगलय् छु जुल जुइ? छन्हु शनिवाः ज्याकुथिइ ओभरटाइम च्वनाः निम्हं लिहां वयाच्वंबलय् म्हुतुं हे तछ् यानाः हे लक्ष्मणकृष्ण मनदेवीयात मतिनाया प्रस्ताव तयाबिल।

छक्वलं स्वीकार यानामदी मनेदेवी मय्जुं। वय् कलं नाइसेच्वंगु सलं भविष्यय् यक्व हे संघर्ष यायेमालीगु खँ न्हयथन। जातपातया हुनिं यानाः आपालं पंगःत ध्वदुइगु खँ थुइकेत स्वल। तर लक्ष्मणकृष्ण भाजुं मनदेवी मय्जुयात त्वःतेगु ला खँ हे मल्हाः। 'गन इच्छा दइ, अन उपायत नं अवश्य दइ' धकाः उखान कनाः मनदेवीयात थुइकेत स्वल। मनदेवीया मिखां लक्ष्मणकृष्णया मिखायात न्हिइका बी थें बी थें यात। तताम्हं मांबाःपिंत खँ न्यंकेत स्वल। अथेहे तताजुपिसं दाइपिंत ह्ययेकल। कन्हय्कुन्हु मनदेवीं लक्ष्मणकृष्णयात औपचारिक रुपं 'ओके' यानाबिल।

मनदेवीं लक्ष्मणकृष्णया मतिनाय थःगु मतिनाया भौ छाप तयाबिल। तर खँ दु जातपातया। मनदेवी तण्डुकार (खुसः), लक्ष्मणकृष्ण ताम्राकार (तबः)। उगु इलय् मेगु जातया लिसे इहिपा यायेगु धयागु तसकं तसकं थाकु। थ्व जात च्वय्, थ्व जात क्वय् धायेगु जातीय भेदभाव तसकं दु। मनदेवीया छैंजःपिं भचा प्रगतिशील जूगुलिं वय्कःया छैंय् धाःसा छुं हे पंगः मवल। तर लक्ष्मणकृष्णया छैंय् धाःसा ग्यानापुक पंगः वल- जातपातया खँय्। संयुक्त परिवार जूगुलिं वय्कःया इहिपाया खँय् स्वीकृति मबिउ। थुकी चिउताः

मतसे लक्ष्मणकृष्णं अन्तरजातीय इहिपा यायेगु धयागु भिष्मप्रतीज्ञा यायेधुंकुगुलिं थःगु छैंया थःथिति मदयेक साधारण कथं नेपाल संवत् १०९६ अक्षय तृतीया कुन्हु स्वयम्भर जुल। वय्कःपिनि इहिपा तसकं हे अःपुक जुल। पंगत छुं हे मवः। थुगु इहिपाया नं थःगु हे बाखं दु।

लक्ष्मणकृष्ण भाजुं थः तसकं स्याःपिं भिम्ह भिनिम्ह पासापिं ज्वनाः मनदेवीया छैंय् भाल। अन मनदेवीया छैंय् मनदेवीया तता केहेंपिं जक च्वनाः स्वयम्भरया ज्या क्वचायेकल। निखलंया छैंय् तःजिक भवय् तक मजुसे तसकं तसकं सरल कथं जूगु थुगु इहिपायात उदारहण कथं कायेछि- छज्वः मतिनामितय् ज्वः मदुगु इहिपा। लक्ष्मणकृष्णया पासापिं दुथ्याःगु जुल स्वयम्भरया इलय्, तर मनदेवीया सुं नं पासापिसं मनदेवीया स्वयम्भर स्वयेमखं। इहिपा जुइवं लक्ष्मणकृष्ण छैं त्वःताः छकू क्वथा बालं कयाः च्वनादिल- मनदेवी व लक्ष्मणकृष्णया न्हूगु संसार दयेकेत।



चिकिचाचिकिचाधंगु खँय् नं ख्वाः थुस्स तयेगु जुइयः। अथे खःसां खँय्भासं छगू उखान हे धयातःगु दु, 'लोने स्वास्नीको भगडा परालको आगो'। छक्वः ह्वानाक्क च्याय, छक्वलं सिनावनी। उकिं जुइ मनदेवी मय्जुं धयादी, 'निर्जीव थलबल छथाय् द्यचिनेबलय् तां तिं सः वइ धासेलिं भी ला मनू खः, नुगः खँ मिलय् मजुइबलय् थाकाथुक जु हे जुइ। थज्याःगु इलय् तिपू निम्हेस्यां अहम् भावना पिमकासे थःथम्हं द्वपं थुइकेमाः। अथे मजुल धाःसा तिपू जीवनय् अहं भावनां यानाः मैममत थें नाया वनकी अस्तित्व हे मदयावनी।'।

वय्कःपिनि दथुइ मेगु खँय् मखु, लक्ष्मणकृष्ण भाजुया बांमलाःगु बानीयात कयाः मनदेवी मय्जुं कचकच याइगु जुयाच्वन। व बांमलाःगु बानी धयागु वय्कः अय्लाः व चुरोटया अम्मली जुयाच्वन। थुगु अमल त्वःतेकत मनदेवी न्ह्याबलें कचकच याइगु, तं चाइगु, ख्वाः थुस्स तइगु। लिपा अय्लाः व चुरोट नितां च्वत्यं क त्वःतेवं इमि दथुइ थाकथुक मजुल।

प्रत्येक मतिनामित जुइमा वा कलाःभाःत जुइमा इमि दथुइ थः कथं सम्बोधन यायेगु याः। वय्कःपिं

निम्हं मतिनामि कथंया इलय् छगू हे ज्याकुथिइ छकू हे क्वथाय् जूगुलिं मनदेवी लक्ष्मणकृष्णयात छुं कथंया नां कयाः सम्बोधन मयाःगु जुयाच्वन। तर लक्ष्मणकृष्ण धाःसा 'मन' धकाः यइपुगु सलं सम्बोधन यायेगु यानादी। इहिपा लिपा इपिं निम्हं कलाःभाःत वा बुराबुरी जुल। अनलिं थवंथवय् सःते मालकि 'अय् बुरा, अय् बुरी' धकाः सःतेगु जुयावल।

गुम्हं गुम्हं मतिनामीत इहिपा जुइ न्हयः च्यःख्याः, अस्यः पह वयेवं ख्याःखी ज्या नं जू। तर वय्कःपिनि दथुइ अज्याःगु बांमलाःगु ख्याः मजू। आःथें उगु इलय् डेटिड वनेगु धयागु उलि मदु। अथे खःसां डेटिड कथं गबलें गबलें ह्वःताः चूलाकाः थीथी द्यःयाथाय् वनेगु ज्या धाःसा जुयाच्वं। अफिसय् नं ख्याःखी यानामदी। अफिसय् जुइबलय् अफिसया चियम व मर्यादाय् च्वनेमाःगुलिं ज्याय् हे जक व्यस्त। लँय् निम्ह जुइबलय् नं दाजुकिजा, त्वाःबहाः मनू नापलाइ धकाः ग्याःचिकुं यानाः उलि ख्याः याना मजुइगु जुयाच्वन। तर लक्ष्मणकृष्णयात धाःसा मतिना जुयाच्वंगु इलय् तसकं रोमाञ्चित ई धयागु ज्यां लिहां वयाः घौछि मनदेवी मय्जुलिसे चाःहिलाः छैं तक तःवनेगु ई जुयाच्वन।

हानं छकः लिसा कयाः धाये मनदेवी व लक्ष्मणकृष्ण मतिनाय तक्वने

न्हयः हे साहित्यकार मय्जु व भाजु खः। मनदेवी नेपालभाषाया साहित्यकार, अथे धयागु बाखं च्वयेगु यानादी। अथेहे लक्ष्मणकृष्ण खस भाय्या साहित्यकार, चिनाखं व उपन्यास च्वयादी। मनदेवी नापलाय् न्हयः हे लक्ष्मणकृष्ण खस भाय्या उपन्यास 'समयको फेरोमा' पिथने धुंकू जुयाच्वन, वि.सं. २०३० सालय्। अथेहे थुगुसी हे 'नगाइएका गीतहरू काव्य सफू पिदनेगु लँपुइ दु। वय्कलं नेपालभाषां च्वसु च्वया मदीसां नेपालभाषाया बाखंयात खँय् भासं हीकाः थीथी पत्रपत्रिकाय् पिथनाच्वंगु दु। ख ला इलय् ब्यलय् मनदेवीया बाखं नेपालभाषा पत्रपत्रिकाय् पिदनाच्वंगु यक्व दयेधुंकल। वय्कःया बाखंत सफूया रुपय् पिदंगु खँ ल्हायेगु खःसा आःतकया दुने प्यंगू बाखं सफू प्रकाशित जुइधुंकल। छसीकथं 'इलं कयंगु लँ' (ने.सं. ११३७), 'लँय् खनागु पलाः' (ने.सं. ११३८), 'धूपवः' (ने.सं. ११००) व 'छैं दुने' (ने.सं. ११४२) जुल।

वय्कःपिनि दथुइ सिर्जना जूगु साहित्यिक रचनायात नं निम्हेस्यां मतिना याइगु जुयाच्वन। दकलय् न्हापां वय्कःपिनि रचनाया सवाः तिपू दुने हे जुयाच्वंगु दु। मनदेवीया बाखंयात लक्ष्मणकृष्णं ब्वनी, गनं भिंकेमाःसा थःगु बिचाः प्वंकी। अथेहे लक्ष्मणकृष्णया च्वसु, चिनाखं मनदेवी ब्वनाः थःगु खँ तयादी। थुकथं सहलह ब्याकाः थःथःगु रचनायात अन्तिम रुप बीगु यानाच्वंगु दु।

लक्ष्मणकृष्ण भाजुं थःगु विगतया खँ लुमंकाः धयादी, 'जीवन छगू संघर्ष खः। शून्य जीवनं शुरु यानाः थौंया स्थिति थ्यंकेत गुलि कुतः जुल, गुकथं जीवन न्ह्यानाच्वन वाः हे मचायेक थन थ्यन।' अथेहे मनदेवी मय्जुं नं थःगु जीवन यात्रा छगू संघर्षशील कथं जिन्दगी हनेमाःगु लुमंकादी। वय्कःपिंत इहिपा लिपा सामाजिक स्वयाः नं आर्थिक समस्यां आपालं कयकय पूवःगु जुल। छैंपाखें भौतिक साधन छुं हे मकासे खालि बालं क्वथाय् दुहां वःपिं थौं इहिपा जूगु नं पीखुदें पुलेधुंकल। थुलिया दथुइ काय छ्ह, थौंकन्हय् सफ्टवेयर इन्जिनियर दु, भौमचा मेडिकल डाक्टर। अथेहे म्हाय् छ्ह मेडिकल डाक्टर, जिलाजं इन्जिनियर। थौंकन्हय् अमेरिकाया सान फ्रान्सिस्कोय् च्वंच्वनादी। काय् व म्हाय् पाखें छ्ह छ्ह म्हाय् दु। धायेबलय् वय्कःपिं मतिनामि, अनं कलाःभाःत, मांअबु, आः वयाः बाज्या अजि। थुकथं स्वयेबलय् शून्यं जीवन न्ह्याकादीपिं साहित्यकार भाजुमय्जु आः ज्याथजिथिया इलय् नं साहित्य सिर्जनाय् जक मखु, आर्थिक, पारिवारिक कथं नं तसकं स्वस्थ दु। थ्व नं छगू ज्वःमदुगु मतिनाया दसु खः।